

實用

中醫典籍寶庫

第十冊

綫裝書局

儒門事親下

張從正撰

儒門事親卷十四

金 考城張從政著

扁鵲華陀察聲色定死生訣要

病人五臟已奪神明不安聲嘶者死

病人循衣縫譫語者不可治

病人陰陽俱絕掣衣撮空妄言者死

病人妄語錯亂及不能言者不治熱病者可治

病人陰陽俱絕失音不能言者三日半死

病人兩目皆有黃色起者其病方愈

病人面黃目青者至期而死重出在下文

病人面黃目赤不死赤如衄血者死

病人面黃目白者不死白如枯骨者死

病人面黃目黑者不死黑如苔死

病人面黑目青者不死

病人面目俱黃者不死

病人面青目白者死

病人面黑目白者不死

病人面赤目青者六日死

病人面黃目青者九日必死是謂亂經飲酒當風邪入胃經膽氣妄泄目則爲青雖天救亦不可生

病人面赤目白者十日死憂恚思心氣內索面色反好急棺槨

病人面白目黑者死此謂榮華已去血脉空索

病人面黑目白八日死腎氣內傷病因留損

病人面青目白五日死

病人着牀心痛短氣脾氣內竭後百日復愈能起徬徨因坐於地其上倚牀能治此者也

病人耳目鼻口有黑色起于入口者必死

病人目無精光若土色不受飲食者四日死

病人目精光及牙齒黑色者不治

病人耳目及顴頰赤者死在五日中午

病人黑色出于額上髮際直鼻脊兩顴上者亦死在五

日中午矣

病人黑色出天中下至上顴上者死

病人及健人黑色若白色起入目及鼻口者死在三日

中矣

病人及健人面忽如馬肝色望之如青近之如黑者必死矣

病人面黑直視惡風者死

病人面黑唇青者死

病人面青唇黑者死

病人面黑兩脇下滿不能自轉反者死

病人目不同直視者一日死

病人頭目久痛卒視無所見者死

病人陰結陽絕目睛脫恍惚者死

病人陰陽竭絕目睜陷者死

病人眉系傾者七日死

病人口如魚口不能復閉而氣出多不反者死

病人臥遺尿不覺者死

病人尸臭者不可治

肝病皮黑肺之日庚辛死

心病目黑腎之日壬癸死

脾病唇青肝之日甲乙死

肺病頰赤目腫心之日丙丁死

腎病面腫唇黃脾之目戊巳死

青欲如蒼壁之澤不欲如藍

赤欲如帛裹朱不欲如赭

白欲如鵝羽不欲如枯骨

黑欲如黑漆不欲如炭

黃欲如羅裹雄黃不欲如土

目赤色者病在心白在肺黑在腎黃在脾青在肝黃色
不可名者病在胸中

診目病赤脉從上下者太陽病也從下上者陽明病也

從外入內者少陽病也

診寒熱瘰癧目中有赤脉從上下至瞳子見一脉一歲死見一脉半一歲半死見二脉二歲死見二脉半二歲半死三脉三歲死

診牙齒痛按其陽明之脉來太過者獨熱在右右熱熱在左左熱熱在上上熱熱在下下熱

診血者脉多赤多熱多青多痛多黑多黃多痺多赤多黑多青皆見者寒熱身痛面色微黃垢黃爪甲上黃疽也安卧少黃赤脉小而濇者不嗜食

診百病死生訣第七

診傷寒熱盛脉浮大者生沉小者死傷寒已得汗脉沉小者生浮大者死

溫病三四日已下不得汗脉大疾者生脉細小難得者死不治

溫病穰穰大熱其脉細小者死

千金穰穰作特行

溫病下痢腹中痛甚者死不治

溫病汗不出出不至足者死厥逆汗出脉堅強急者生
虛緩者死

溫病二三日身體熱腹滿頭痛熱如故脈直而疾者八
日死四五日頭痛腹痛而杜脈來細強十二日死八九
日頭不疼身不痛目不變色不變而反利脈來喋喋按
之不彈手時時心下堅十七日死

熱病七八日脈不軟一作喘不散一作數者當有瘡瘡

後三日溫汗不出者死

熱病七八日其脈微細小便不利加暴口燥脈代舌焦
乾黑者死

熱病未得汗脈盛躁疾得汗者生不得汗者難瘥

熱病已得汗脉靜安者生脉躁者難治

熱病已得汗大熱不去者亦死

熱病已得汗熱未去脉微躁者慎不得刺治

熱病發熱熱甚者其脉陰陽皆竭慎勿刺不汗出必下利

診人被風不仁痿痺其脉虛者生堅急疾者死

診癰病虛則可治實則死

診癰病脉實堅者生脉沉細者死

又癰疾脉得大滑者久而自已其脉沉小急實不可療

小堅急者亦不可療也

診頭痛目痛久視無所見者死

診人心腹積聚其脉堅強急者生虛弱者死又實強者
生沉者死其脉大腹大脹四肢逆冷其人脉形長者死
腹脹滿便血脉大時絕極下血小疾者死

腸澼便血身熱則死寒則生

腸澼下白沫脉沉則生浮則死

腸澼下膿血脉懸絕則死滑大則生

腸澼之屬身熱脉不懸絕滑大者生懸澹者死以臍期

之

腸澼下膿血脉沉小留連者生數疾且大有熱者死

腸澼筋攣其脈小細安靜者生浮大緊者死

洞泄食不化不得留下膿血脉微小連者生緊急者死

洩注脈緩時小結者生浮大數者死

蟲蝕陰注其脈虛小者生緊急者死

欬嗽脈沈緊者死浮直者浮軟者生小沉伏匿者死

欬嗽羸瘦脈形堅大者死

欬脫形發熱脈小堅急者死肌瘦下脫形熱不去者必

死

欬而嘔腹脹且洩其脉弦急欲絕者死

吐血衄血脉滑小弱者生實大者死

汗若衄其脉小滑者生大躁者死

吐血脉緊强者死滑者生

吐血而欬上氣其脉數有熱不得卧者死

上氣脉數者死謂損形故也

上氣喘息低昂其脉滑手足溫者生脉澁四肢寒者必

死

上氣面浮腫肩息其脉大不可治加利必死

上氣注液其脉虛寧伏匿者生堅强者死

寒氣上攻脉實而順滑者生實而逆者死

太素云寒氣在上脉滿實

何如曰實而滑則生實而逆則死矣其形盡滿何如曰舉形盡滿者脉急大堅尺滿而不應如是者順則生逆則死何謂順則生逆則死所謂順者手足溫也逆者手足寒也

病痺脉實大病久可治脉弦小堅急病久不可治

消渴脉數大者生細小浮短者死

消渴脉沉小者生實堅大者死

水病脉洪大者可治微細不可治